

des que vos yo aya fecho en qualquier manera fasta aqui, que non vala en ningun tienpo, saluo esta.

E mando al conçeio e a los alcaldes de la çibdat de Murçia, o a qualesquier dellos que este mi aluala vieren que vos defiendan esta merçed que vos yo fago a qualquier que quisiere yr contra ella e vos la quisiere quebrantar en alguna manera. E non fagan ende al so pena de la mi merçed e de seysçientos maravedis desta moneda vsual a cada vno dellos.

Fecho en la çibdat de Burgos, primero dia de mayo era de mill e quatroçientos e çinco años.

Yo el Rey.

157

1367-V-2, Burgos.—Carta de Pedro I al concejo, ordenando que Ferrand Oller sea uno de los trece hombres buenos en sustitución de Guillén Celrrá, que había muerto. (A.M.M., C. R. 1367-1380, folios 2 v.º-3 r.º).

Don Pedro por la graçia de Dios rey de Castiella, de Leon, de Toledo, de Gallizia, de Seuilla, de Cordoua, de Murçia, de Jahen, del Algarbe, de Algezira e señor de Molina, al conçeio, e alcaldes, e omes buenos de la çibdat de Murçia, e a cada vno de vos, salud e graçia.

Bien sabedes que Guillen Çeldran, vezino de y de la dicha çibdat, que era vno de treze omes buenos que an de veer fazienda del conçeio de la dicha çibdat; e agora por quanto me dixeron que el dicho Guillen Çeldran que es finado yo por esto e por fazer bien e merçed a Ferrant Oller, vezino de y de la dicha çibdat, tengo por bien que sea vno de vos los dichos treze omes buenos que auedes çe veer fazienda del conçeio de la dicha çibdat en lugar del dicho Guillen Çeldran.

Porque vos mando, vista esta mi carta, que vno de vos los dichos ofiçiales tomedes jura en conçeio al dicho Ferrant Oller sobre la señal de la Cruz e los Santos Euangelios, que bien e verdaderamente vsara del dicho ofiçio e guardara mio seruiçio, e mio señorío, e pro de y de la dicha çibdat, e todas las otras cosas que deue e es tenuto de guardar e pertenesçen al dicho ofiçio. E fecho el dicho juramento que lo reçibades e ayades por vno de vos los dichos treze omes buenos que auedes de veer fazienda del dicho conçeio en lugar del dicho Guillen Çeldran, e vsad con el en el dicho ofiçio segund que vsauades con el dicho Guillen Çeldran al tienpo que era biuo e auia el dicho ofiçio, e recoditle e fazedle recodir con el salario e derechos que al dicho ofiçio pertenesçen, segund que mejor e mas conplidamente recodides e fazedes recodir a cada vno de vos los dichos treze omes buenos que auedes de veer fazienda del dicho conçeio. E non fagades ende



al por ninguna manera so pena de la mi merced. E desto le mande dar esta mi carta seellada con mio sello de çera.

Dada en Burgos, dos dias de mayo era de mill e quatroçientos e çinco años.

Yo, Gonçalo Ferrandez, la fiz escriuir por mandado del Rey. Alfonso Garçia. Pero Bernalt, vista.

1367-V-14, Aranda.—Provisión de Pedro I al concejo y justicias de Murcia, mostrando su satisfacción por haberse alzado con la ciudad en su servicio, les declara libres de responsabilidad por la muerte de Ramón Oller por ser partidario de Enrique de Trastamara y les ordena poner paz en la ciudad y guardarla para su servicio. (A.M.M., C. R. 1367-1380, fol. 3 v.º).

Don Pedro por la graçia de Dios rey de Castiella, de Leon, de Toledo, de Gallizia, de Seuilla, de Cordoua, de Murçia, de Jahen, del Algarbe, de Algezira, e señor de Molina, al conçeio, e a los alcaldes, e alguazil de Murçia, salud e graçia.

Sepades que vy vuestra carta en que me enbiastes dezir de como auiades tomado mi voz e vos auiades alçado con esa çibdat para mio seruiçio, e de como matarades al traydor de Ramon Oller, vuestro vezino, porque andaua diziendo e leuantando muchas maldades e trayçiones contra mio seruiçio, e pedricando a los omes por los enduzir que estudiesen e perseuerasen en su maldat teniendo voz del traydor del conde, e entendi todo lo que por la dicha vuestra carta me enbiastes dezir. Feziesteslo muy bien e tengouoslo en seruiçio, e bien çierto era yo e so de vos, que fariades por mio seruiçio quando lugar ouiesedes todo lo que vos pudiesedes, e que por vos non menguaría cosa, por lo qual so tenuto de vos fazer mucho bien e mucha merçed.

E mando vos que asoseguedes agora esa çibdat lo mas que pudieredes e la fagades velar e rondar muy bien de noche e de dia porque este guardada como cunple a mio seruiçio, como so çierto de vos que lo faredes asi. E a lo que dezides de la muerte de aquel traydor que me pediades por merçed que vos non fuese demandada, sabed que nunca vos sera demandada, mas antes vos mando que a todos los traydores que acudieren alla en mio deseruiçio boluiendo esa tierra e esa çibdat a los pudieredes tomar que los fagades la buena obra que feziestes aquel traydor, porque otros non se atreuan a fazer ninguna cosa contra mio seruiçio.

Dada en Aranda, seellada con mio sello de la poridat, catorze dias de Mayo era de mill e quatroçientos e çinco años.

Yo, Gonçalo Ferrandez, la fiz escriuir por mandado del Rey.

